

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 78 (1993)

Heft: 5

Artikel: Caspar Decurtins e la baselgia catolica

Autor: Flury, Johannes

DOI: <https://doi.org/10.5169/seals-882626>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>

Caspar Decurtins e la baselgia catolica



Johannes Flury

«Patertgei vid quei exempl da religiun e politica catolica. Buca laschei menar sin intschess de politica buca catolica entras da quels umenets che teman l'aua benedida, senuspescan dal priedi, frequentan buca la baselgia las domengias e quentan buca cun la forza supernaturala dils ss. sacraments ... Che Sgr. Dr. Decurtins ha tier tuttas caschuns accentuau quella idea fundamentala da tutta politica, quei ei per el in gloriis meret ed ins astga supponer, ch'il Segner hagi era tonschiu ad el la pagaglia persuenter.» Quei ein ils plaids che sur R.G. Caminada ha detg en siu riug gl'emprem da zercladur 1916 avon il vischi da Caspar Decurtins.

Decurtins, il spindrader dalla claustra da Mustér, confundatur dall'universitad da Friburg, iniziant dil moviment cristian-social ed aschia indirectamein era dalla partida cristian-democrata, Decurtins, igl amitg da Leo XII ed undraus da Pius X

cun ina brev persunala, Decurtins ch'ei sepresentaus a caschun da divers congress en cumpignia da Bebel, ch'enconuscheva persunalmein tut ils menaders socialists da siu temps, Decurtins ch'ei s'engaschaus el cussegl naziunal cun plaids nunemblideivels per ils purs pigns ed ils interess dils cantuns e che ha battiu el medem mument per la legislaziun europea - el era propi da casa dapertut.

Ella Gasetta Romontscha dils 21 da zercladur 1916 scriva «gg» (la scursaniziun per sur G.A. Brugger) dil davos cumbat, e sco el manegia il pli grond da Decurtins, sil camp dalla religiun: «Decurtins ei aber adina staus consequent catolic tochen tier la fossa: ... Il defunct ei staus in capo-officier en l'armada, che il sogn Papa Pius X ha menau encunter il mund digl antichrist.»

Gest quella davosa battaglia - che vegn aunc a fartschentar nus - ha lavagau a moda decisiva il meini che biars da ses contemporans vevan da Decurtins sez e da sia

relaziun cun la baselgia. El ei daventaus ina «persona non grata», in legn per ils pli tier, ha giu breigias da vegnir sut tetg cun sias publicaziuns ed ei vegnius mess dapersei dil mund academic universitar da Friburg. Quei ei stau ad el gest tuttina, ad el mava ei per il salvament dalla baselgia. Per quella finamira ha el vuliu ughegiar tut e pli che tut.

Quei tema tucca pia ina vart centrala, jeu schess bunamein intima dil caracter ed esser da Decurtins. Tractar quella detagliadamein fuss ton sco scriver la historia da sia veta e surtut da ses cumbats. Jeu vi serestrenscher ad entgins aspects.

La baselgia sco patria

Il senn profund dalla baselgia ei dad esser - tenor Decurtins - il liug nua ch'il sacrament digl altar fa reviver adina puspei il misteri dalla cardientscha cristiana. Il patratg ch'il spiritual creigi buca pli enten la midada da paun e vin en carn e saung da Cristus e dubeti cheutras dall'incarnaziun che schabegia adina danovamein ella eucaristia, quei patratg era per el buca d'imaginar, gie havess muntau la fin dalla baselgia. Per quei motiv ha el priu posiziun aschi decididamein encunter A. Loisy e condemnau surtut il fatg che quel ha cuntuau da far messa, malgrad che la baselgia haveva privau el da quei dretg. Cheu setracta ei dil pli central dalla baselgia. Decurtins ha perquei adina assistiu alla messa, en tgei tiara e liug ch'el era e magari la damaun allas tschun, perfin suenter notgs da laver ni da fiasta. Per el era quei dapli che mo obligaziun, il liug nua ch'el s'entupava culla sontgadad. Mai udin nus dad el in plaid da critica enviers igl uffeci dil sacerdot, malgrad ch'el era fetg letraus e che sia formaziun teologica survargava quella dils biars spirituals. Pil solit scheva el clar e bein siu meinis pertucont personas e lur meinis, denton mai in plaid critic encunter il sacerdozi sco tal.

Quei ch'jeu hai mussau cheu cun gl'exempel dil spiritual vala era per la baselgia. Cun tutta vehemenza pren Decurtins sil muc svilups dubius (ni quei ch'el taxescha aschia). La baselgia sezza vegn denton mai messa en damonda. Il cuntrari: tut daventa per render ella pli clara, pussenta, pli pura e splenduronta.

Ils babs dalla baselgia sco fundament

Dapi siu temps alla scola cantunala a Cuera ha Decurtins legiu ils patrists, ils babs dalla baselgia. Quei semuossa tochen els davos onns da sia veta. Paucas jamnas avon sia mort admonescha el la giuventetgna catolica: “Wir wissen kein besseres


Mittel, den katholischen Sinn zu vertiefen und zu stärken als das fleissige Studium der Väter.” Vitier vegn la historia dalla baselgia che muossa a nus - tenor mein da Decurtins - co anflar las verdads eternas e la cuntuuitad. La baselgia astga buca bandunar quei funs. Per el han svilups sbagliai dil temps modern adina lur ragisch el fatg che la scienzia teologica stema buc avunda ils patrists e la tradiziun dalla scolastica medievala.

A pèr cun quella aulta stema dalla tradiziun va ina clara negligentscha dalla tradiziun biblica. Quei ei nuot aparti per la teologia neo-scolastica dil 19avel tschentaner. Decurtins citescha la bibla pil pli per dar illustraziuns punctualas. Ton sco mai sviluppesccha el in patratg sebasond sill'interpretaziun d'in text. La raschun da quei ei sia perschuasiun che la baselgia hagi manteniu e dau vinavon en sia historia il messadi dalla sontga scartira a moda nunsfalsificada. Ei menass ad in subjectivissem religius da sereferir directamein alla Bibla, ed igl ei era tipic che Decurtins considerescha quei subjectivissem dil 19avel tschentaner sco in artadi dalla reformaziun.

Avertura al temps modern

Ei po far surstar che quella tenuta ha buca generau in cristianissem totalmein retrospectiv. Per Decurtins era gl'avegnir dalla baselgia buca da tschercar en ina repetiziun dil temps medieval. Il cuntrari! Sco strusch in auter ha el animau la baselgia da sefatschentar cullas damondas da siu temps. Sia sfida veseva el oravontut els problems socials. La baselgia ei sin piarder il proletariat. Decurtins sedosta per il beinstar dalla classa dils luvrers, denton buca semplamein per segirar alla baselgia dapli adherents e cheutras era dapli pussonza. Senza la forza salvificonta dalla religiun cristiana che la baselgia sa intermediar ei il luvrer tuccaus ed offendius el funs da siu esser carstgaun. Mo enteifer la baselgia sa el esser carstgaun, salvar sia dignitat e viver tenor sia vocaziun. Perquei sto la baselgia interpreter tut per migliurar las condizioni dils luvrers, per dismetter il sistem dallas classas e regurdar ils patruns vid lur responsabladad sociala. Al cuntrari dils socialists e communists da siu temps leva Decurtins migliurar las plagas da siu temps cun midar las relaziuns socialas tenor las ideas dalla baselgia e buca cun revoluziuns pascheivlas ni violentas. Quellas ideas eran per part fretgs dalla doctrina catolica, per part naschidas ord il dretg natural.

Il messadi cristian-social che Decurtins ha defendiu tochen ellas pli aultas instanzas dalla curia era - tenor siu meini - buca enzatgei maisudiu ella dogmatica, mobein l'applicaziun dils principis che la scolastica veva gia sviluppau. El ha repetiu senza cal che siu grond exempl, igl uestg Ketteler, seigi staus scolasticher e da l'auter maun ultramontans. Cun centrar la doctrina dalla baselgia, sia actividad ecclesiastica e sociala sin la doctrina dils gronds babs dalla baselgia e sin Roma, il center dalla baselgia catolica, sperava Decurtins dad impedir che la baselgia sespiardi en acziuns puramein caritativas e socialas. Aunc inagada, omisduas caussas ein succedidas cun la finamira da mantener la dignitat dil carstgaun, da lubir ad el da viver tenor sia vocaziun divina. Igl ei perquei capeivel ch'el ha per exempl pretendiu cun emprema prioritat che la dumengia daventi in di liber e che la dunna vegni liberada da laver pagada. Tut auter ses concumbattants socialists che han pretendiu gia da bial'entschatta ils medems dretgs per umens e dunnas.



Era las metodas da Decurtins eran orientadas enviers igl avegnir. Ella politica locala, denton era per influenzar la baselgia, ha el duvrau cun gronda efficacitad las demonstraziuns da massa. Sia teoria era bein influenzada dil temps medieval, sias metodas perencunter eran modernas. Per contonscher sias finamiras eis el era buca senuspius da far coaliziuns che eran fetg nunusitadas el mund catolic da siu temps: per exempl cun protestants conservativs, socialists e magari perfin cun ateists illuminai. Decurtins veva buca tema da vegnir en contact cun glieud dad autra pasta e quei distingua el claramein da gruppaziuns cun ideas che paran semegliontas allas sias e ch'ins taxescha oz sco fundamentalistas. Per amur da sias finamiras ha el pactau encunter dretg e seniester cun dretg e seniester.

Liberalissem e baselgia

Per Decurtins ei il liberalissem dil 19avel tschentaner igl inimitg per propi dalla baselgia. Quella ideologia economica che veva en ses eglis mo ina suletta mira, quella da maximar il gudogn, era il prighel che smanatschava da laguoter il carstgaun, da degradar el ad ina forza da lavur e da destruir cheutras sia dignitat. Encunter quella forza deva ei per Decurtins mo ina vera cunterpussonza: la baselgia.

Il punct da partenza per Decurtins ei il renomau «Syllabus» da Pius IX che condemescha tut quei ch'era ligiau els eglis dil papa al mund modern. Per Decurtins ei quei «Syllabus» ina attacca frontala encunter il liberalissem. Siu program dil catolicissem social ei nuot auter che l'applicaziun e la realisaziun da quel e perquei vesa el negina discrepanza denter Pius IX e Leo XIII (pli tard Pius X). Ei setracta adina dil medem inimitg. Ord quella optica daventan era las coaliziuns da Decurtins pli capeivlas. El mava d'accord culs socialists e culs protestants conservativs ch'il liberalissem seigi la pussonza adversaria che destrueschi tuttas valetas. En quei connex astg'ins denton buca emblidar ch'il liberalissem dil 19avel tschentaner ei per part decididamein anticlericals: quel vuleva metter freins all'influenza dalla baselgia, surtut dalla catolica, el sectur dall'educaziun e sur quel ora, abolir il federalissem, surtut leu nua che quel impedeva ils cantuns catolics da seguir il svilup liberalistic dils cantuns protestants dalla Bassa. Il federalissem da Decurtins era en quei senn ina parallela cun siu cumbat pils drets dils luvrers, in cumbat encunter la surpussonza dil centralissem spirontamein economic ed inhuman. Ch'el cumbatteva quei centralissem cun in auter, cul centralissem roman en fuorma digl ultramontanissem, era en ses eglis nuot auter che consequent: mo aschia era ei insumma pusseivel da far frunt a quella pussonza. Il centralissem dalla baselgia catolica romana ha contribuiu en ina dialectica impresiunonta alla survivenza dil federalissem.

Ina gada dapli semuossa ei che Decurtins saveva unir caussas che paran oz a nuston sco nunconciliablas. Ultra da quei ei Decurtins sez staus in um dallas

contradicziuns che ha capiu d'unir caussas en sia persuna che paran a nus sco fiug ed aua.

Il davos inimitg - il modernissem

La perseveronza da Decurtins ei sia fermezia ed era sia fleivlezia. El ei staus fideivels a sias perschuasiuns senza midar gnanc in iota. Aschia ha el bein savens fatg figura d'in defensur d'ideas da stiarsas. Exempels per quei fatg ein la transformaziun dil moviment cristian-social en ina partida politica, ina midada cun la quala Decurtins ha buca pudiu tener tila, ni era sia midada dalla politica ella scienzia nua ch'el ha strusch pli anflau resonanza, ni siu cumbat pil federalissem che ha atgnamein piars sia raschun d'esser cun il seconstituir dil stat federal modern. Il medem semuossa era ella debatta sur dalla scola grischuna. Leu ha el impundiu dabia forza ed elan per caussas che devan l'impressiun d'ina Surselva isolada, d'ina Surselva ch'ei deva gnanc lu en quella fuorma nundir cuort temps pli tard.

En quei senn san ins constatar ch'el ei staus in grond animader, in ch'ei buca senuspius da batter per projects, era sch'els eran aunc buca madirs, in che ha capiu d'agir spert e senza gronds risguards, sch'el era perschuadius d'ina caussa. La cuntinuitad era denton buca sia fermezia - auters han stuiu s'engaschar en siu stagl, savens cun breigia. Il meglier exemplpel per sia moda e maniera d'agir ei siu agid per la fundaziun dall'universitat da Friburg e sia relaziun cun cusseglier guovernativ Francis Python, ina relaziun ch'ei sestgirentada pli e pli. En lur correspondenza semuossa ei pli che clar, co Decurtins daventava malpazients e capeva dad intrigar, da sclauder igl uestg responsabel Mermillod, da calmar ils auters uestgs svizzers. A Roma ha el mess tut en moviment; cura ch'igl uestg Mermillod ha vuliu exprimer leu ses dretgs e meinis, eis ei iu cun el sco en la renomada praula digl erizun e dalla lieur: adina ei Decurtins staus gl'emprem ed ei ius culla groma. Inagada che l'universitat ei stada messa en pei, ei Decurtins denton daventaus pli e pli in buordi per ella. El sa buca acceptar che biaras caussas sesviluppeschan auter che quei ch'el veva giu previu. Ei va vess da schar liber siu «affon». (Forsa era in reflex da sia atgna experientscha d'haver stuiu schar ir siu sulet fegl ch'ei morts da buob. Ensemen cun sia dunna ha Decurtins encuretg ed anflau confiert en in viadi alla curia romana - puspei ei la baselgia patria per el.)

Forsa per compensar quellas experientschas sebetta Decurtins el davos decenni da sia veta ella battaglia encounter il modernissem, in moviment enteifer la baselgia. Quei moviment che ageva enteifer e per part era ordeifer la baselgia leva unir la cardientscha al «temps niev». La finamira era da render la ductrina attractiva e «gustusa» als contemporans dil 19avel tschentaner che «cartevan» plitost ella scienzia. Cun quei vi jeu buca caricaturar quei moviment. Ils modernists sesprovan seriusamein da render pli accessibla la cardientscha (per buca dir pli bien-

marcau). Els pitevan dalla discrepanza che separava pli e pli la glieud instruida e scolada dalla baselgia catolica. Els levan intermediar la ductrina dalla baselgia romana mintgamai ellas relaziuns concretas, vevan pia ina vesta fermamein naziunala, ni viu globalmein federalista. Buca per nuot vegn in precursur, in moviment fetg moderau, numnaus «americanissem».

Cumbats tut insurin

Decurtins batta en emprema lingia buca encunter ils modernists ch'ein sorti dalla baselgia ni ch'ein vegni excommunicai suenter las empremas reacziuns dalla curia (1907). El pren en mira il modernissem enteifer la baselgia. En ses eglis ei quel bia pli prigulus perquei ch'el vul empalar la baselgia - senza ch'ella s'encorschi da quei - en ina direcziun che Decurtins caracterisescha sco protestantisazion dalla baselgia, sco pass enviers ina cardientscha marcada digl illuminissem e dil liberalissem. Per el ein las consequenzas nundubiteivlas: ina subjectividat totala, ina divisiun en ina roscha gruppas pintgas, ina etica dil «sco ei para e plai». La cardientscha dils patrists sto vegnir intermediada ella cultura moderna - cheu dat ei negin dubi per Decurtins. El veva gie occupau ina professura cun quei intent, l'universitad da Friburg era vegnida fundada gest per quei motiv. El sez era gie in exempl vivent per la cumbinaziun da cardientscha e cultura. El carteva denton che la cardientscha catolica stoppi buca semidar en quei process d'avischinaziun vicendeivla - gnanc pil ner d'in'ungla.

Cun ina ortodoxia e segirtad d'haver raschun el cor emprova Decurtins da presentar, criticar ni da far valer las miras giustificadas dil modernissem. Tuttenina catta el dapertut fumegls zuppai da quel, all'universitad da Friburg, alla scol'aulta a Cuera, ella belletristica, en revistas catolicas. Siu antimodernissem daventa ina mania nunsupportabla per ses amitgs, per ses inimitgs ei quei la cumprova ch'el seigi gia adina staus in um dalla stgiraglia medievala.

El secavistrescha en ina nauscha dispeta cun Anton Gisler, da lezzas uras professer alla scol'aulta da Cuera e pli tard uestg auxiliar. Siu cudisch «Der Modernismus» ch'ei daventaus in'ovra da referenza ei suspects a Decurtins perquei ch'el dat buca la tezla dil modernissem a tut quei ch'ei buca absolutamein conform alla lingia ufficiala. Quella dispeta muossa evidentamein il maletg maximalistic dalla baselgia che Decurtins ha cultivau en ses davos onns. Quei vala era per sias «Drei Briefe an einen jungen Freund» che tractan surtut il modernissem ella belletristica. Buca valetas litteraras decidan dall'imporzonza d'ina ovra, mobein schebein l'ovra corrispunda alla ductrina ufficiala dalla baselgia. Ei va vess d'acceptar in tal meini dad in um aschi cultivau sco Decurtins.

Igl ei grev da suandar il patratg da Decurtins en quels onns. El senuspescha buca da render attenta Roma sin vias puleinas en la baselgia svizra ni silmeins sin quei

ch'el considerava aschia. Ins ha dau ad el dil «freda-modernists» e davos noda accusav'ins el d'esser in denunziant.

Decurtins ei buca seturpegiaus da quei - insumma buc. Per el era tut quei l'expressiun da sia carezia per la baselgia roman-catolica e quella era tenor siu meini periclitada tochen el funs da siu esser. L'obligaziun da mintga catolic era da vegrin en agid ad ella, da batter per ella cun tut ils mieds. Decurtins ha entschiet quei cumbat ed ei morts en quel. Decurtins ei denton mai sedumandaus tgei consequenzas che quei hagi per siu maletg dalla baselgia, sche quella sto vegrin salvada cun tals mieds dad inimitgs veritabels e presumai. El fiug dil cumbat ei quella damonda mai dada el tgau a Decurtins. La risposta havess saviu spindrar el d'enquala acziun malinschigneivla. Ch'ei mava per el denton adina e dapertut per la baselgia e buca per el sez, quei fatg resta veseivels atras ils decennis, nunfiltraus, denton aunc adina impressiunonts.

Translaziun: Claudio Vincenz